

**“ТАСДИҚЛАНГАН”
“O‘zenergositish” АЖ
Ягона акциядорининг
2025 йил 14 апрелдаги
4-сонли қарори билан**

**“O‘ZENERGOSOTISH” АКЦИЯДОРЛИК ЖАМИЯТИ КУЗАТУВ
КЕНГАШИ АЪЗОЛАРИНИНГ ЖАВОБГАРЛИГИНИ СУЎУРТАЛАШ
ТАРТИБИ ТЎҒРИСИДАГИ НИЗОМ**

Тошкент – 2025 йил

МУНДАРИЖА

I. УМУМИЙ ҚОИДАЛАР.....	3
II. АТАМАЛАР ВА ТАЪРИФЛАР.....	3
III. КУЗАТУВ КЕНГАШИ АЪЗОЛАРИНИНГ ЖАВОБГАРЛИНИ СУҒУРТАЛАШ ТАРТИБИ ВА МЕЗОНЛАРИ.....	4
IV. СУҒУРТАЛОВЧИ ТАШКИЛОТГА НИСБАТАН ҚЎЙИЛАДИГАН ТАЛАБЛАР	5
V. КУЗАТУВ КЕНГАШИ АЪЗОЛАРИНИНГ ЖАВОБГАРЛИГИНИ СУҒУРТАЛАШ МАНБАЛАРИ	5
VI. ЯКУНИЙ ҚОИДАЛАР	5

I. УМУМИЙ ҚОИДАЛАР

1.1. Ушбу “О‘zenergositish” АЖ Кузатув кенгаши аъзоларининг жавобгарлигини суғурталаш тўғрисида”ги Низом (кейинги ўринларда - Низом) Ўзбекистон Республикасининг Фуқаролик Кодекси, Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисидаги”ги ва “Суғурта фаолияти тўғрисида”ги Қонунлари ҳамда Вазирлар Маҳкамасининг “Давлат иштирокидаги корхоналар ва тижорат банклари фаолиятининг операцион самарадорлигини ошириш чора-тадбирлари тўғрисида”ги 2024 йил 31 июлдаги 464-сонли Қарори ва “О‘zenergositish” АЖ (кейинги ўринларда - Жамият) Уставига мувофиқ ишлаб чиқилган ва Жамиятнинг Кузатув кенгаши аъзоларининг жавобгарлигини суғурталаш тартибини белгилайди.

1.2. Ушбу Низом Жамият Ягона акциядорининг қарори билан тасдиқланади ва унга киритилган барча ўзгартириш ва қўшимчалар Жамият Ягона акциядорининг қарорлари асосида амалга оширилади.

II. АТАМАЛАР ВА ТАЪРИФЛАР

2. Ушбу қоидада қуйидаги атамалар ва таърифлар қўлланилади:

Кузатув кенгаши – Жамият фаолиятига умумий раҳбарликни амалга оширувчи орган ҳисобланади, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикаси қонунида ва Жамият Уставида акциядорларнинг умумий йиғилиши ваколатига қирадиган масалаларни ҳал қилиш бундан мустасно.

Кузатув кенгашининг аъзолари - “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикасининг Қонуни ва Жамият Уставида назарда тутилган тартибда Акциядорларнинг умумий йиғилиши (ягона акциядор) томонидан уч йил муддатга сайланадиган шахслар.

Кузатув кенгашига давлат улуши бўйича тайинланган (сайланган) аъзолар - “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикасининг Қонуни ва Жамият Уставида назарда тутилган тартибда Жамият устав капиталидаги давлат улуши бўйича сайланган Ўзбекистон Республикасининг давлат хизматчилари ва давлат иштирокидаги корхоналар вакиллари бўлган шахс.

Кузатув кенгашининг мустақил аъзоси - “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикаси Қонунининг 76-моддасида назарда тутилган тартиб ва қоидалар асосида Жамият Кузатув кенгаши таркибига сайланган (тайинланган) шахслар.

Кузатув кенгаши аъзоларининг жавобгарлиги - кузатув кенгаши аъзоларининг кузатув кенгаши таркибидаги фаолияти давомида ҳар қандай даъволар натижасида юзага келиши мумкин бўлган молиявий мажбуриятлар.

Даъво – ёзма равишда кузатув кенгаши аъзоси ёки аъзоларига нисбатан уларнинг ушбу кузатув кенгаши аъзоси сифатидаги фаолияти оқибатида тақдим этиладиган фуқаровий, жиноий, маъмурий, норматив ёки арбитраж иши муносабати билан юзага келган молиявий йўқотишни қоплаш юзасидан тақдим этилган ёзма талаб.

Суғурталовчи – Тегишли турдаги суғуртани амалга ошириш учун лицензияга эга бўлган ва суғурта шартномасига мувофиқ суғурта товони (суғурта тўлови) тўловини амалга ошириш мажбуриятини олувчи тижорат ташкилоти бўлган юридик шахс.

Суғурталанган шахс – Кузатув кенгашининг аъзоси;

Суғурта қилдирувчи – кузатув кенгаши аъзоларининг жавобгарлиги суғурта полисини харид қилувчи корхона (Жамият);

Суғурта полиси лимити – суғурталовчи томонидан барча даъволар бўйича полисининг амал қилиш муддати доирасида тўланиши мумкин бўлган маблағлар миқдори.

III. КУЗАТУВ КЕНГАШИ АЪЗОЛАРИНИНГ ЖАВОБГАРЛИГИНИ СУҒУРТАЛАШ ТАРТИБИ ВА МЕЗОНЛАРИ

3.1. Жамият ўз кузатув кенгаши аъзолари томонидан кенгаш аъзоси сифатида амалга оширилган ёки амалга оширилганлиги тахмин қилинган қонунга зид бўлган амалиётлари натижасида юзага келган молиявий мажбуриятларни (харажатларни) қоплаш мақсадида Кузатув кенгаши аъзоларининг жавобгарлигини суғурталашни амалга оширади.

3.2. Суғурталанган Кузатув кенгаши аъзоси томонидан қасддан амалга оширилган фирибгарлик, қонунбузарлик ҳолатлари оқибатида ёки суғурта полиси кучга киргунга қадар юзага келган молиявий мажбуриятлар суғурта полиси билан қопланмайди.

3.3. Жамият Кузатув кенгаши аъзолари учун битта суғурта полиси тузилади ва улар томонидан кенгаш аъзоси сифатида амалга оширилган қонунга зид бўлган ҳаракатлари (амалиётлари) натижасида Жамиятга нисбатан тақдим этиладиган фуқаровий, жиноий, маъмурий, норматив ёки арбитраж иши муносабати билан юзага келган даъволар бўйича молиявий йўқотиш ва мажбуриятларни (харажатларни) қоплашга хизмат қилади.

3.4. Суғурта полисининг амал қилиш муддати камида бир йил этиб белгиланади ва муддати тугагач суғурта қилдирувчи томонидан янгиланиб борилади.

3.5. Суғурта полисининг амал қилиш даврида Кузатув кенгашига янги сайланган аъзолар автоматик равишда суғуртага қамраб олиниши кўзда тутилиши лозим.

3.6. Кузатув кенгаши таркибидан чиқиб кетган аъзолар учун суғурта полиси уларнинг кузатув кенгаши аъзоси сифатидаги фаолият даври учун ўз кучини сақлаб қолади.

3.7. Суғурта полисининг энг юқори лимити 1 000 000,0 (бир миллион) АҚШ доллари эквивалентига тенг миқдорда белгиланади. Жамият ўз кузатув кенгаши аъзолари жавобгарлигини суғурталашда мазкур лимит доирасидан чиқиб кетмаслиги керак.

3.8. Суғурталанган шахслар суғурталовчи томонидан тақдим этилган ёки суғурталовчи билан келишилган ҳолда бошқа адвокат (юримдик) корхоналар хизматларидан фойдаланишлари зарур.

3.9. Жамият Кузатув кенгаши аъзоларининг жавобгарлигини суғурталашда Жамият Ягона акциядорининг қарори билан қўшимча мезонлар ҳам белгиланиши мумкин.

3.10. Жамият томонидан Кузатув кенгаши аъзоларининг жавобгарлигини суғурталаш учун суғурталовчи ташкилотни жалб қилиш Ўзбекистон Республикасининг амалдаги қонунчилиги талаблари асосида амалга оширилади.

IV. СУҒУРТАЛОВЧИ ТАШКИЛОТГА НИСБАТАН ҚЎЙИЛАДИГАН ТАЛАБЛАР

4.1. Суғурталовчи ташкилот суғурта полиси бўйича белгиланган ўз мажбуриятларининг камида 50 фоизини халқаро тан олинган суғурта компанияларда қайта суғурталаши керак.

4.2. Суғурталовчи ташкилот миллий рейтинг шкаласига кўра камида uzA++ тўлов қобилияти рейтингига эга бўлиши керак.

V. КУЗАТУВ КЕНГАШИ АЪЗОЛАРИНИНГ ЖАВОБГАРЛИГИНИ СУҒУРТАЛАШ МАНБАЛАРИ

5.1. Кузатув кенгаши аъзоларининг жавобгарлигини суғурталаш манбаалари Жамиятнинг маблағлари ҳисобланади.

5.2. Мазкур Низомга мувофиқ Кузатув кенгаши аъзоларининг жавобгарлигини суғурталашга тўланадиган суғурта мукофоти тўғрисидаги маълумотлар амалдаги қонун ҳужжатларида назарда тутилган ҳолларда Жамият томонидан белгиланган тартибда ошкор қилиниши мумкин.

VI. ЯКУНИЙ ҚОИДАЛАР

6.1. Мазкур Низом Жамият Ягона акциядори тасдиқлаган кундан бошлаб кучга киради ва бекор қилинмагунча амал қилади. Унда кузда тутилмаган қоидалар амалдаги қонунчилик ҳужжатлари билан тартибга солинади.

6.2. Ушбу Низомнинг айрим қоидалари Ўзбекистон Республикаси қонунчилигига ва (ёки) Жамият Уставига зид бўлса, улар ўз кучини йўқотади ва мазкур ҳолатларда Ўзбекистон Республикасининг амалдаги қонунчилиги ва (ёки) Жамият Уставига амал қилинади.